

आओ खेदचै



डॉ. सुषमा रानी



Dr. Nirmal Singh

DY. CHIEF MINISTER
J&K STATE

सनेहा

मिगी इस गल्लै दी बड़ी मती खुशी ऐ जे डॉ० सुषमा हुंदी एह त्रीऽ कताब “आओ खेढ़चै” प्रकाशत होऐ करदी ऐ। इस कोला पैहलै बी इ'नें दो कताबां लिखी दियां न। ते हून एह बाल नाटक लिखियै इ'नें नाटककारा दे रूपै च अपनी इक बक्खरी पन्शान बनाई लैती ऐ।

डोगरा लोक संस्कृति कन्नै सज्जी दियें ग्राई खेढे राहें जयाणे खेढें-खेढें च गै स्यपुणे दियां मसालां पेश करी दिंदे न इ'नें नाटके राहें सुषमा होरें बखूबी चित्तरें दा ऐ।

में इ'नेंगी बधाई दे कन्नै-कन्नै अपनियां शुभकामनां बी दिन्नां जे एह अपना साहित्यिक सफर होर अगै लेई जान।

डॉ० निर्मल सिंह



GOVERNMENT OF JAMMU AND KASHMIR
CHIEF MINISTER

Office of the Chief Minister

NOTICE

That the Government of Jammu and Kashmir are pleased to appoint Mr. [Name] to the post of [Post] in the [Department] at [Place] from the [Date] to the [Date] on the salary of Rs. [Amount] per month with all the allowances and benefits payable to officers of that rank and grade.

This appointment is subject to the approval of the [Authority] and the [Authority] is hereby notified.

Yours faithfully,
[Signature]

[Signature]
[Name]
[Designation]

आओ खेदचै

डॉ० सुषमा रानी

प्रकाशक



हाइब्रो पब्लिकेशन्ज़
बाड़ी ब्राह्मणा, जम्मू

AAO KHEDCHE

(Two Plays for Children)

by

Dr. Sushma Rani

ISBN No. : 978-93-82670-78-0

© लेखक

Mobile : 9419255188

प्रकाशन ब'रा

2016

*

पैहली बारी

500

*

मुल्ल

₹ 150/-

*

मिलने दा पता

डुंगर मंच

डोगरा हाल, जम्मू

*

छापाखाना

क्लासिक प्रिंटर्ज


बाड़ी ब्राह्मणा, जम्मू

मो. 94191-49293

समर्पण

एह बाल नाटक अ'ऊं
अपनी स्वर्गीय माता जी
श्रीमती शकुंतला देवी
ते पिता

श्री आत्मा सिंह
होरें गी समर्पित करनियां
जि'दै बेहड़ै आ'मीं
इ'यै जनेहियां खेढां खेढियां
हियां।



अज्ज डोगरी साहित्य दे हर खेत्तर च जनानियें-कुड़ियें दा शामिल होना दिक्खियै मिगी बड़ी खुशी होन्दी ऐ। इक स्हाबैं एह सलक्खनी गल्ल ऐ, शुभ लगनी ऐ। सुषमा गी में अलोचनात्मक लेख पढ़दे सुने दा ऐ। उसदी भाशा पर निगगर पकड़ गी दिक्खियै में मसूस कीता हा जे इस कुड़ी च कम्म करने दी सलाहियत ऐ। अज्ज एह बच्चें आस्तै दो निक्के-निक्के नाटक लेइयै डोगरी दे नाटक साहित्य च अपनी पनशान बनान आवा करदी ऐ। नाटक इक मुश्कल विधा ऐ। अज्ज जनानियां कुसा बी मुश्कल कम्मा गी चनौती समझियै उस पाससै पैर बधा करदियां न। इन्नै बी बधाया ऐ। इसदा सुआगत ऐ ते मेरियां शुभकामना बी जे एह अपने इस प्रयास च सफल साबत होऐ।

पद्मा सचदेव



इक बक्खरी सोच मजबूत गैऽ

डोगरी नाटक लेखन दे काफले च अज्ज बी बेशक्क गिनती दे गै हत्थ न पर उ'न्दी कलम चा निकली दियां कृतियां कुसा बी भारती भाशा दे नाटक कोला कुसा चाल्ली बी घट्ट नेई हैन। इसदा सारें कोला बड़डा कारण इ'नें कृतियें दा अपनी धरती, अपने लोकें ते अपनी संस्कृति कन्नै नेड़मां सरबंध ऐ। भाएं ओह विश्वानाथ खजूरिया हुन्दा 'अछूत' होऐ जां दीनूं भाई पन्त हुन्दा 'सरपंच' जां फही इन्दे मगरा लखोने आहले हूनां तक्करा दे नाटक।

इ'नें सभनें नाटकें गी सर्वश्रेष्ठ बनांदे न इ'न्दे च मज्जुद इ'न्दे समाजक सरोकार। साफ गल्ल ऐ जे कुसा बी साहित्यक कृति गी अमर जां चिर-स्थायी बनाने आस्तै छड़ा उसंदा शिल्प गै मददगार नेई होन्दा, उसदे च आक्खी गेदी गल्ल गै उसगी अमर जां चिर-स्थायी बनांदी ऐ। पर बच्चें आस्तै लिखदे होई गल्ल दे इलावा तरीकाकार दा बी ध्यान रखना पौंदा ऐ, तां जे गल्ल सैहजता कन्नै बच्चें तक्करा पुज्जी सकै। खुशवा इस्सै करियै इस कम्मा गी मुश्कल कम्मा दी श्रेणी च रखेआ जंदा ऐ। सच्च-मुच्च गै बच्चें आस्तै लिखना मुश्कल कम्म ऐ ते खास करियै बच्चें आस्तै नाटक लिखना होर बी मुश्कल होंदा ऐ। डोगरी च इस मुश्कल कम्मा दी शुरूआत नरेन्द्र खजूरिया होरें कीर्ती ते बच्चें आस्तै किश बेहतरीन नाटक लिखे ते फही ओह नाटक "अस भाग जगाने आले आं" नांऽ दी पोथी च पाठकें आस्तै उपलब्ध

करोआए। फही इस मुश्कल कम्मा गी सैहल करने च जोगदान दित्ता डा० ओम गोस्वामी होरें। उ'नें बच्चें आस्तै नाटकें दे कन्नै-कन्नै उपन्यास बी लिखे। फही ज्ञानेश्वर होरें बी इसदे च जोगदान दित्ता ते प्रो० शिवदेव मन्हास होरें बी। अपनी तोफीक दे मताबक मैमीं इसदे च जोगदान दित्ता ते 'पंज बाल रंग' नांऽ दी पोथी छापी।

इस्सै कड़ी च आई जुड़ी ऐ एह पोथी जिसगी डा० सुषमा रानी दी सिरजनात्मक कलम नैं सिरजे दा ऐ। डा० सुषमा इस बेल्लै डोगरी अदब च इक जाना पनशाना नांऽ ऐ। जिसने डुगार दी लोक संस्कृति पर कलम चलाईयै ते "डोगरा लोक संस्कृति" नांऽ दी पोथी छपाइयै अपनी कलम दा लोहा पैहलें गै मनोआई लेदा ऐ, ते फही अलोचना दे खेत्तर च बी अपना टकोहदा नांऽ बनाने च डा० सुषमा रानी कुसा कोला पिच्छें नेई हैन। ते हून "आओ खेढचै" नांऽ दी एह पोथी जिसदे च बच्चें आस्तै दो नाटक शामिल न, राहें एह डोगरी अदब च इक बक्खरी पन्शान बनान जा करदियां न। एह पन्शान इस करियै बी भलेयां बक्खरी मन्नी जाग की जे हूनै तक नाटक लेखन च महिलाएं दा जोगदान नफी दे बराबर गै रेआ ऐ। भाएं ओह डोगरी नाटक लेखन दी गल्ल होऐ ते भाएं दुनियां भरा दे नाटक लेखन दी। कारण किश बी रेह होन पर सचाई ते इ'यै ऐ। बेशक्क डोगरी च मती पैहलें शान्ता शर्मा होरें 'कच्च' नांऽ दा शानदार ते सबूरा नाटक लिखियै महिलाएं दे जोगदान गी मजबूती कन्नै दर्ज करोई दित्ता हा, पर गल्ल अगगें नेई बधी। डा० सुषमा रानी होर नां सिर्फ उस गल्ला गी अगगें बधाऽ करदियां न, सगोआं इक सिद्धहस्थ नाटककारा दे तौर पर डोगरी दे नाटक जगत च अपना जोगदान देने आस्तै अपनी गैंऽ अगड़ी बधाऽ करदियां न।

‘आओ खेढचै’ नां३ दी इस पोथी च डॉ० सुषमा रानी नैं दो निक्के-निक्के नाटक शामिल कीत्ते दे न, आओ खेढचै ते पच्छोता३। एह दोऐ नाटक डुगगर दे सांस्कृतिक विरसे च खिल्लरे दे बेशकीमती खजाने गी आधार बनाइयै लिखे गेदे नाटक न, जेहड़े बड़ी गै सैहजता ते सरलता कन्नै बच्चें गी भलेयां अपने ते उ'न्दे गै सेही होने च पूरी चाल्ली सक्षम न। दौनें नाटकें दी कथा वस्तु दा आधार डुगगर दियां लोक खेढ्ढां ते लोक कत्थां होन्दे होई बी इ'न्दा शिल्प बक्खरा-बक्खरा ऐ। “आओ खेढचै” नां३ दा नाटक जित्थैं अज्ज दी प्रचलत शैली नुक्कड़ शैली च ऐ तां दूआ नाटक ‘पच्छोता३’ आधुनिक मंहुआ शैली (प्रोसीनियम) शैली च लिखेआ गेदा नाटक ऐ। इसदे कोला नाटक लेखन ते रंगमंच उप्पर सुषमा हुन्दी मजबूत पकड़ दा पता चलदा ऐ। बच्चे म्हेशां बड़्डें दी नकल करदे न, उ'न्दे आंगर लब्भना चाहन्दे न, उ'न्दे आंगरा बनना चाहन्दे न। उ'नें गी तौले बड़्डे होने दी, बड़्डे बनने दी चाहत उ'न्दे कोला किश न किश करोआन्दी गै रौहन्दी ऐ। इससै चक्करै च केई बारी ओह बगाड़ बी करी ओड़दे न। उ'न्दियां मतियां हारियां खेढ्ढां बी उ'दें बड़्डे बनने दी चाहत चा गै उपजी दियां खेढ्ढां न। जि'यां चोर-शपाई खेढना, घर-घर खेढना, पोशन पा खेढना, गुडियां-पटोले खेढनां जां टीचर-टीचर खेढना बगैरा-बगैरा। इ'नें खेढें राहें ओह बड़्डें दा रोल करदे होई किश चिरा आस्तै अपने आप गी बड़्डा गै समझदे न ते अपने भोलेपना च ऐसियां-ऐसियां स्यानियां गल्लां बी करी जन्दे न। जेहड़े स्याने बी सुनियै दंग रेई जन्दे न। सुषमा होरै अपने पैहले नाटक च बच्चें दे इससै मनोविज्ञान गी बड़ी बरीकी कन्नै दर्शाने दी इक सफल कोशश कीत्ती दी ऐ। सिर्फ इ'यै नेई, इसदे कन्नै-कन्नै उ'नें अज्ज दे

समेंऽ दियें प्रज्वलत समस्याएं गी बी अपने नाटक दा आधार बनाए दा ऐ। दूए नाटक दा आधार बी लोकमानस ऐ, ते लोकमानस च प्रचलत इक कहानी, जिसी बड़े गै सुन्दर ते सैहज ढंगा कन्नै नाटकी शकल देइयै प्रस्तुत कीत्ता गेदा ऐ। इसदे च नाटककारा नैं पलैश बैक जनेई टैकनीक दा बी सहारा लैत्ते दा ऐ। दोऐ नाटक अपनी गै चाल्ली दे बक्खरे ते टकोहदी पनशान रखने आहले नाटक न, ते बच्चें दे मानसिक कार ब्हेआर गी नजरी च रक्खियै लिखे गेदे पूरी चाल्ली सफल नाटक न। डोगरी दे बाल नाटक साहित्य च इ'नें गी इक उपलब्धी मन्नेआ जाग, मेरा एह कामल यकीन ऐ ते मेद कीत्ती जाई सकदी ऐ जे लेखिका होर बी नाटक लिखियै, डोगरी नाटक जगत च न सिर्फ महिला लेखिकाएं दी उपस्थिति गी होर मजबूती कन्नै दर्ज करोआग, सगोआं अपनी लेखनी कन्नै समूलचे डोगरी नाटक साहित्य गी मालामाल बी करग।

शुभकामनाएं कन्नै

मोहन सिंह

अपने पासेआ

एन.सी.ई. आर.टी दी तरफा 16 फरबरी थमां 25 फरबरी 2016 तगर होने आहली दस रोजा थिएटर वर्कशाप जेह्ड़ी नमीं दिल्ली च होई ही Director of School Education डिपार्टमेंट दी तरफा मिगी बी भेझेआ गेआ। इस वर्कशाप च थिएटर कन्नै जुड़े दे देसै दे नामीं डायरेक्टर, ऐक्टर, संगीतज्ञ ते प्रोफैसरें इ'नें दस्सैं रोजें च नाटक लिखने ते खेढने दे केई गुर सखाए। इत्थूं प्रेरणा लेइयै जिसलै अ'ऊं आपूं बी नाटक लिखने दी कोशिश कीती तां इक बाल नाटक लिखियै आदरजोग मोहन सिंह होरें गी सनाया तां उ'नें मिगी बड़ा प्रोतसाहित करदे होई आखेआ जे अ'ऊं इक होर नाटक लिखियै छपबां। इस शा पैह्लै अ'ऊं किश इक कहानियां गै लिखी दियां हियां पर इस चाल्ली दी कदे कोई कोशिश बी नेई ही कीती दी। नाटक छपवानें शा पैह्लै अ'ऊं श्री ध्यान सिंह होरें गी पढ़ियै सनाए हे ते उ'दे आसेआ दिते गेदे सुझाएं गी बी नाटके च शामिल कीत्ता।


मेरा पैह्ला नाटक 'आओ खेढ़चै' च दस्सेआ गेदा ऐ जे ज्याणें अपने घरें, स्कूल ते समाज च जो किश होंदा दिखदे न उस्सै दा अनुसरन बी करदे न भाएं ओह चंगा होऐ ते भाएं माड़ा। इसै चाल्ली दुआ नाटक 'पच्छोता' ऐ जेह्ड़ा ज्याणें दे इस सच्च गी बांदै करदा ऐ जे जेकर ज्याणें गी चंगा म्हौल थोऐ ते उ'नें गी

तराशनें लेई मांऽ-बब्ब अपना सकारात्मक जोगदान देन तां ओह
 चंगी बत्ता उप्पर चलने लेई अग्रसर होई जंदे न इसदे इलाबा इ'नें
 दौनें नाटकें च डुगगर संस्कृति दी झलक बी दिक्खने गी लभदी
 ऐ। में एह दोऐ नाटक बड़ी गै लौले यानि एक ठेड़ म्हीने अंदर
 गै लिखी ओड़े हे। नाटक बिधा च एह मेरी पैहली कोशिश ऐ।
 मेरे स्हाबें एहदे च किश खामियां जरूर रेही गेदियां होनियां न।
 मेद करनियां अगला नाटक लिखने तगर तुस (पाठक) सब्भै
 लेखक, आलोचक ते खासकरियै नाटककार मिगी अपने सुझाऽ ते
 शीबाद जरूर देगे ?

सुषमा रानी

विशे सूची

- | | |
|--------------|----|
| 1. आओ खेढ़चै | 15 |
| 2. पच्छोताऽ | 39 |





आओ स्वेढचै

पात्तरें दा परिचे

कुड़ियां

नांऽ

उमर

- | | |
|----------|----------------|
| 1. पिंगी | सभनें दी 10 शा |
| 2. टीना | 14 बरें बशकार |
| 3. शैलू | |
| 4. नीतू | |
| 5. मीना | |
| 6. डॉली | |

जागत

1. बबलू
2. सोनू
3. राजू



[लगभग 11 बजे दा समांऽ ज्याणें इक-इक करियै ग्रांऽ दे मझाटै इक बड़्डे जनेह् अम्बै दे बूह्ते हेठ किट्ठे होऐ करदे हे। पिंगी, टीना ते शैलू पैह्लै गै पुज्जी गेदियां हियां, जिन्ने चिरै गी सारे किट्ठे होंदे, ओह् इन्ना चिर गीह्ते खेढने दी सबील करन लगदियां न।]

टीना : आओ गीह्ते खेढचै।

शैलू : ठीक ऐ, पर पैहली बारी मेरी।

पिंगी : तेरी बारी की ? तूं कोई लाड़ साह्ब दी धीऽ ऐं गे ?

टीना : अच्छा बस्स करो लड़ो नेई, चलो पैह्लै भुगने आं।

पिंगी : ठीक ऐ।

(त्रैवै इक-दुए दा हत्थ फड़ियै बाह्मां अगै-पिच्छै ल्हांदे होई भुगन लगदियां न)

त्रैवै : “आंटे मांटे टाइयो टिच, टिच दी पड़िच घुगगी आह्लड़े दे बिच्च।”

(ते शैलू दा हत्थ सिद्धा ते पिंगी ते टीना दा हत्थ पुट्ठा पोंदा ऐ। इस चाल्ली पैहली बारी शैलू दी औंदी ऐ।)

शैलू : (पिंगी आस्सै दिक्खियै) आक्खेआ हा न! पैहली बारी मेरी।

पिंकी : (जले-भुज्जे दे कचा जनेहा मूंह बनांदे होई नक्क चाढ़दी ऐ) तूं रोल पाया ऐ, तूं रोल पाइयै झट्ट हत्थ सिद्धा करी ओड़ेआ हा।

शैलू : चल झूठी कुसै पास्से दी।

पिंकी : झूठी तूं ऐ, अ'ऊं नेई।

शैलू : “झूठिये झूठ तूं मारगी साढ़ा केह बगाड़गी ते नानी खोतै चाढ़गी।”

टीना : सारा मजा खराब करी ओड़ेआ। अ'ऊं चली घर, अ'ऊं निं तुं'दे कन्नै खेढना।

(टीना जाने आस्तै मुड़न गै लगदी ऐ जे इच्चरै गी बबलू ते सोनू दौड़दे उं'दे कोल पुज्जी जंदे न)

बबलू : शैलू ओह दिक्ख, नीतू कन्नै अज्ज राजू बी आवै करदा ऐ। चलो फटाफट खेढ़ शुरू करचै।

(सब्भै किट्ठे होई जंदे न। उ'नेंगी दिक्खियै टीना दा सारा रोह ढली जंदा ऐ ते ओह झट्ट फही खेढनें गितै राजी होई जंदी ऐ। ज्याणें दियें गल्लें दा रौला जन पेई जंदा ऐ कोई आखदा घर-घर खेढना, कोई आखदा टापू-लूता, कोई छूहन-छपाही ते कोई धाम भोजड़ी।)

शैलू : (कन्ने उप्पर हत्थ रक्खियै) सारे चुप करो।

(फही सब्भै चुप होई जंदे न ते उसदे मूंह आस्सै दिक्खन लगदे न इच्चरै गी टीना बोल्ली पौंदी ऐ)

- टीना : चलो घर-घर खेढने आं।
- सोनू : असें नेई खेढना रोज गै घर-घर, अज्ज कोई होर खेढ खेढनेआं।
- नीतू : स्कूल-स्कूल खेढने आं।
- बबलू : चल परै बड़ी आई पढौकल। (होरनें आस्सै दिखदे होई) वित्ती-डंडा खेढने आं।
- शैलू : जेकर तुसें साढ़े कन्नै स्कूल-स्कूल नेई खेढनां तां जाओ बक्खरे खेढो।
- राजू : बबलू स्कूल-स्कूल गै खेढी लैन्नें आं, किट्ठे खेढगे तां मजा बी आंग।
- बबलू : चल ठीक ऐ।
(सबभै खुश होइयै आपूं-चें च फुस-फुस करदे न)
- राजू : टीचर कु'न बनग भई ?
(इस शा पैहलै जे कोई होर बोलदा नीतू झट्ट हत्थ उप्पर करियै बोली)
- नीतू : में, में बनड टीचर।
- शैलू : कीऽ ? तुंऐ कीऽ ? स्कूल ते कदे टैमै सिर पुजदी नेई। (सुआंग लांदे होई) 'में बनना टीचर' बड़ी आई।
- नीतू : तुगी बी ते कल कलासै च मैडम ने खड़ेरे दा गै हा, तूं केहड़ा Home Work कीते दा हा।
(लड़ने दी मनशा कन्नै शैलू ते नीतू होर नेडै आई)

जंदियां न इस शा पैहलै जे शैलू किश बोलदी
बबलू झट्ट दौनें बशकार खड़ोई जंदा ऐ।)

बबलू : टीना बनग टीचर। बस, खेढना ते खेढो नेई तां...।

सोनू : ठीक ऐ, इसदी मम्मी बी ते टीचर ऐ।

सब्भै ज्याणे : ठीक ऐ, ठीक ऐ...

(सब्भै ज्याणें क्लासै आंगर बेही जंदे न)

(टीना डप्पटे गी साड़ी आंगर पलेटियै टीचर दा
अभिनय करदे होई क्लासै च औंदी ऐ ते सब्भै
उट्ठी पौंदे न)

ज्याणे : नमस्ते मैडम जी।

सोनू : नमस्ते SSS मैडम जी।

(सब्भै हसदे न)

टीचर : नमस्ते बच्चो, सब्भै बेही जाओ।

ज्याणे : जी, मैडम....जी।

टीचर : (हाजरी लांदे होई) रोल नं. इक, रोल नं. दो, रोल
नं. त्रै, रोल नं. चार, रोल नं. पंज, रोल नं. छे,
रोल नं. सत्त.....।

सोनू : जी मैडम जी (खड़ोइयै)

टीचर : चल-बबलू अपनी कापी दा इक Page लेइयै Black
board साफ कर ते इक मिगी दे।

(बबलू झट्ट कापी दे दो Page फाड़ने ते Black
board साफ करने दा अभिनय करदा ऐ, ते दुआ

टीचर गी दिंदा ऐ। टीचर Page लेइयै कुर्सी साफ करने दा अभिनय करदी ऐ ते फही Page नेड़ा करियै पिच्छै सुट्टी दिंदी ऐ। इस्सै चाल्ली बबलू बी Page भु'जां सुट्टी दिंदा ऐ।

टीचर : अच्छा ते बच्चो, अज्ज अस पढ़गे नरोआ (शुद्ध) वातावरण।

सब्भै ज्याणे : जी मैडम जी।

टीचर : बच्चो, तुसेंगी पता ऐ? जे वातावरण गी शुद्ध रखने शा पैहलै असेंगी अपने शरीरै गी बी साफ सुथरा रखना चाहिए।

नीतू : हां मैडम जी, पता ऐ।

टीचर : हां ते नीतू खड़े होइयै सभनें गी सनांऽ जे असेंगी अपने शरीरै दी साफ-सफाई गितै केह-केह करना चाहिदा? (नीतू खड़ोइयै बोलन लगदी ऐ)

नीतू : असेंगी रोज बडलै ते रातीं लै दातन जां ब्रुश करना चाहिदा।

(होर ज्याणे बी बड़े उत्साह कन्नै अपने-अपने हथ खड़े करदे न)

टीचर : शाबाश! नीतू बेही जा। राजू तूं सनांऽ होर केह करना चाहिदा ?

राजू : (खड़ोइयै) असेंगी रोज न्हौना चाहिदा, (किश चिर रुकियै) रुट्टी खाने शा पैहलै ते बाद च शैल चाल्ली साबनै कन्नै हथ धोने चाहिदे।

- टीचर : शाबाश वेही जा, सोनू तूं सना।
- सोनू : असेंगी धोते दे कपड़े लाने चाहिदे ते कन्नै नैंह बी कटिटयै रक्खने चाहिदे।
- बबलू : (थोहड़ा बल्लें जनेही पर सभनें गी सनोची जंदा ऐ) मैड़म दे अपने नैंह ते दिक्खो किन्ने बड़्डे-बड़्डे न।
(सारी क्लास हस्सन लग्गी पौंदी ऐ ते ढीठ जन मैड़म अपने हत्थ पिच्छै करियै नैंह छपैलने दे जतन करदी ऐ)
- टीचर : (रोहै कन्नै) चुप, सारे चुप होई जाओ। आँदा-जंदा ते किश ऐ निं जेल्लै दिक्खो। दंद कढदे रौंहदे ओ। (बबलू गी सम्बोधित करदे होई) बबलू तूं किश मतियां गै गल्लां करनां ऐं। चल बिंद पिच्छै होइयै खड़ोई जा।
(सभै चुप होई जंदे न। ते बबलू पिच्छै जाइयै खड़ोई जंदा ऐ)
- टीचर : एह ते होई शरीरै दी सफाई। इसदे इलावा बाताबरण गी नरा नरोआ रक्खने आस्तै असेंगी होर केहड़िये-केहड़िये गल्लें दा ध्यान रक्खना लोड़चदा ऐ?
- सोनू : (हत्थ उप्पर करियै खड़ोई जंदा ऐ) असेंगी साफ पानी, पीना चाहिदा।
- शैलू : असेंगी होर मते बूहटे लाने चाहिदे न ते जेहड़े लागे दे न उं'दी दिक्ख-रिक्ख बी करनी चाहिदी।

- टीचर : बिल्कुल ठीक। होर, बबलू तू सना जां तुगी छड़ियां गल्लां गै औँदियां न ?
- बबलू : असेंगी पानी बर्बाद नेई करना चाहिदा।
- टीचर : ठीक ऐ। कोई होर किश आखना चाहंदा ऐ ?
(ज्याणें चुप राँहदे न) तुसें सारें सच गै गलाया ऐ।
पर इसदे कन्नै-कन्नै असेंगी होर गल्लें दा बी ध्यान रक्खना लोड़चदा ऐ।
- ज्याणे : होर केह् मैडम जी?
- टीचर : शरीरै दी सफाई दे कन्नै-कन्नै मता जरूरी ऐ जे साढ़े बिचार ते साड़ी सोच बी नरोई ते साफ-सुथरी होऐ। अर्थात् साढ़े विचारें दी सफाई बी जरूरी ऐ।
- शैलू : पर बिचारें दी सफाई कि 'यां करनी ?
- टीचर : बिचारें दी सफाई दा मतलब ऐ, जे असेंगी कुसै दे बारे च कदें बी बुरा नेई सोचना चाहिदा ते सारें दी मदद बी करनी चाहिदी।
- पिंकी : झूठ नेई बोलना चाहिदा।
- टीचर : ते सभनें दी इज्जत बी करनी चाहिदी। इससै गी आखदे न। मानसक ते शरीरक सफाई। इसदे कन्नै-कन्नै असेंगी अपने घर, अपने गैहली-महल्ले ते अपने स्कूलै गी बी साफ-सुथरा रक्खना चाहिदा।
- सोनू : मैडम जी अपने शरीरै दी सफाई ते ठीक ऐ पर घरै दी सफाई ते मम्मी करदी ऐ, ते गैहलियें दी सफाई ते सफाई आहले ने करनी होंदी न ?

टीना : हां, ते स्कूलै दी सफाई गितै बी ते सफाई कर्मचारी
लगे दे न।

टीचर : ओह ते ठीक ऐ, पर जेकर अस सब्भै बी साफ-
सफाई दा ध्यान रखचै, कोई बी चीज तांह-तुआंह
नेई सुट्टियै dustbin दा इस्तेमाल करचै तां सफाई
आहले दा कम्म ते घटग गै सगुआं गंद बी नेई पौग।

शैलू : (सुट्टे दे कागजै आस्सै शारा करांदे होई) मैडम
जी तां ते फही असेंगी इ'यां कागज बी नेई सुट्टने
चाहिदे। (बाकी ज्याणे हसदे न)

सोनू : जी मैडम जी, जेकर अस गंद पौन गै नेई देगे तां
साढ़ा घर बाहर ते स्कूल किन्ना शैल ते साफ-
सुथरा लभग न?

टीचर : शैलू, सोनू तुस बिल्कुल ठीक आक्खारदे ओ।
(उट्टियै कागज चुक्कियै dustbin च सुट्टे होई)
अज्जै शा अस सारे एह प्रण करनेआं जे नां ते गंद
पागे, नां गै गंद पौन देगे।

सब्भै ज्याणे : जी मैडम जी....

(ते सब्भै रौला पांदे उट्टी जंदे न
चलो चलो घर चलो हून कल खेढ़गे।

अगला सीन

(अगलै रोज फही सब्भै ज्याणे अम्बै दे बूहटे हेठ
किट्टे होन लगी पे। सारें शा पैहलै शैलू, डाली ते
बबलू पुजदे न)

- शैलू : बबलू मीना निं आई अजें ?
- बबलू : ओह् पैहलै कदे बी टैमै सिर पुज्जी ?
- शैलू : अज्ज असें इसगी अपने कन्नै नेई खढ़ाना, इसगी बी ते पता लगै जे चिरें पुज्जनें दी सजा बी थ्हांदी ऐ।
- डाली : कल ते बड़ी आखारदी दी ही तौले पुज्जेओ, नेई तां अ'ऊं परतोई जाना ई।
(इन्ने चिरें टीना, नीतू, सोनू सब्भै आई जंदे न ते फही)
- मीना : (पुजदे गै) चलो-चलो खेढ़ शुरू करो।
- बबलू : बड़ी आई, खेढ़ शुरू करो (सुआंग लांदे होई) नेई खढ़ाना तुगी असें अपने कन्नै।
- मीना : कीऽ! कीऽ नेई खढ़ाना मिगी ?
(ढाकें उप्पर हत्थ रक्खियै थोहड़ी अगै औंदी ऐ)
- बबलू : कीऽ केह्, रोज चिरें औन्नी ऐ ? ते फही आक्खनी, कीऽ नेई खढ़ाना ?
- मीना : (लिंधी होई दी ते कन्नै किश रोहे होई दी) ठीक ऐ, मत खेड़्दो मेरे कन्नै अ'ऊं चली बापस।
(जाने दा अभिनय करदी ऐ)
- टीना : (झट्ट बोली पेई) बलग ते सेही (मीना खड़ोइयै पिच्छै दिखदी ऐ) दिक्ख मीना, असेंगी रोज गै तेरे करी चिरें खेढ़ शुरू करनी पौंदी ऐ।
- मीना : आखेआ न कलै शा चिर नेई लाड। (कन्न पकड़दे होई) अज्ज माफी देई ओड़ो।

- टीना : चल ठीक ऐ।
- शैलू : अच्छा, तां दस्सो फही अज्ज केह् खेढ़चै ।
- पिंकी : अज्ज डॉ०-मरीज खेढनें आं।
- सोनू : आहो। एह् ठीक ऐ।
(सब्भै ज्याणें झट्ट अपनी सैह्मती दिंदे न)
- ज्याणे : ठीक ऐ-ठीक ऐ।
- नीतू : ठीक ते ऐ, पर डॉ. कु'न बनग ?
- मीना : (किश सोचने दा नाटक करियै) बबलू तूं बनगा डॉ०?
- बबलू : हां, में बनड डॉ०। (खुश होइया ऐ)।
- सब्भै ज्याणे : (खुश होइयै) चलो-चलो....
(ज्याणें आपू-चे किश फुसफुस करदे न। ते फही बबलू टाई स्थारी करने दा अभिनय करदे होई हत्थै च पैन कापी लेइयै बाकी ज्याणें शा थोहड़ी छिंडै होइयै डॉ. दा अभिनय शुरू करदा ऐ)
- सोनू : डॉ० साहब जरा नब्ज दिक्खो हा। जिंद कसरी लगा करदी ऐ।
- डॉ० : (नब्ज दिक्खियै उसदे नैंह ते फही अक्खीं दिखदा ऐ) भई, तेरे च ते खूनै दी कमीं होई गेदी ऐ।
- सोनू : ओह् कैह्दे कन्नै होई गेई भला ?
- डॉ० : लगदा ऐ तुं'दा खाना-पीना किश खरा नेई ऐ।

- सोनू : डॉ० साहब खाने च ते कोई कमी नेई ऐ। अ'ऊं अज्ज बी घरा चाही कन्नै चार-पंज परौठियां खाइयै गै निकलेआ हा।
- डॉ० : अच्छा, राती लै केह् खाद्धा हा ?
- सोनू : आलू-पूड़ियां डॉ० साहब। (शानै कन्नै बोलदा ऐ)
- डॉ० : अच्छा, ते रोजमर्रा दे खाने च होर केह्-केह् खंदे होदैं ओ तुस ?
- सोनू : बडलै चाह ते रस, परौठियां जां कचौरियां, देपैहरी दाल भत्त ते रातीं लै पूड़ियां, भरोठे जां होर किश शैल सुआदला मसालेदार। होर केह्?
- डॉ० : तां फही साग-सब्जियां कुसलै खंदे ओ ?
- सोनू : डॉ. साहब एह् घाऽ-छाऽ कु'न खा ? अस ते मता पकोआन गै खन्ने आं।
- डॉ० : इ'यै ते तुसेंगी भलेखा ऐ। नरोई सेहत आस्तै हरियां पत्तेदार सब्जियां बड़ियां गै जरूरी होदियां न। दालीं दे कन्नै-कन्नै खाने च भांत-संभाते साग ते होर, बत्थहेरियां सब्जियां न जिं'दा असेंगी रोज इस्तेमाल करना चाहिदा।
- सोनू : तुं'दा मतलब, एह् सुआदले पकोआन नेई खाने चाहिदे?
- डॉ० : नेई, अ'ऊं पकोआन खाने गितै ठाकेआ थोह्ड़े ऐ, अ'ऊं ते एह् आखना जे पकोआन कदें कुतै जरूर खाओ पर, रोजमर्रा दी जिन्दगी च साग-सब्जियें दे

कन्नै-कन्नै दुद्ध, दही, छाह, पनीर, ते ब्हारी फलें दे
इलावा जेकर तुस मासाहारी ओ तां अंडे, मीट ते
मच्छी दा प्रयोग बी करना चाहिदा जिस कन्नै खूनै
दी कमी बी नेई होंदी ते टिड्ड बी साफ़ रौंहदा ऐ।

सोनू : अच्छा, पर चाह पीने च ते कोई हर्ज नेई है न ?
(सोनू डकार मारदा ऐ)

डॉ० : ऐ बी ते नेई बी, पर खरा होग जेकर चाही दी जगह
दुद्धै दा इस्तेमाल कीता जा। उ'आं रज्जियै ब्हारी
फल ते सब्जियां खाने कन्नै गैस दा नुक्स बी ठीक
होई जाग।

सोनू : अच्छा।

(डॉ० पर्ची उप्पर किश लिखने दा अभिनय करदा
ऐ ते पही पर्ची सोनू गी पकडादे होई आखदा ऐ)

डॉ० : एह दबाई लिखी दित्ती ऐ, लेई लैएओ, पर जेहड़ा
परहेज दस्सेआ ऐ ओह्दे उप्पर गौर जरूर करेओ।

सोनू : (पर्ची पकड़दे होई) जी डॉ० साहब, तुंदी बड़ी
मेहरबानी।

(हून मीना ते पिंकी डॉ० कश औंदियां न। मीना
पिंकी बारै डॉ० गी सनांदी ऐ)

मीना : डॉ० साहब इसगी सिर पीड़ ऐ ते कन्नै सिर चक्कर
बी औंदा ऐ, जिसकरी किश तनाऽ च रौंहदी ऐ।

डॉ० : नब्ज दिखदे होई। होर केह तकलीफ ऐ इसगी ?

- मीना : आखदी ऐ पढ़ने दा मन निं करदा ते जेकर पढ़न
व'वै तां किश चेत्ता निं रौह्दा। दिक्खो हां इसगी
किश बमारी ते नेई। उ'आं मिगी ते शक्क पौंदा ऐ
कुतै किश कीता कराया निं होऐ।
(डॉ० धोइयै मीना पाससै दिखदा ऐ)
- डॉ० : एह तकलीफ कदूं दी ऐ भला ?
- मीना : मता गै चिर होई गेआ ऐ। (पिंकी दी नब्ज दिखदे
होई डॉ. दी नजर ओहदे दूए हत्थै उप्पर पौंदी ऐ।)
- डॉ० : एह मोबाइल कोहदा ऐ ?
- मीना : डॉ० साहब एह मेरा मोबाइल हा, पर हून अ'ऊं
इस्सी गै देई ओड़े दा ऐ।
(पिंकी खुश होंदे होई मोबाइल आस्सै दिखदी ऐ)
- डॉ० : पर इसगी मोबाइल दी केह लोड़ ऐ ?
- मीना : डॉ० साहब अज्जै-कलै दे ज्याणे कुत्थै आक्खै
लगदे न। उ'आं एहदी जमातै दे सभनें ज्याणें कोल
मोबाइल हैन। एहदा बी ते मन करदा गै ना। पर
अ'ऊं अजें तोड़ी इसगी स्कूल नेई जे लेन दिता।
- डॉ० : (हसदा ऐ) पिंकी तूं कुसी-कुसी फोन करनी ऐ ?
- पिंकी : अ'ऊं कुत्थै फोन करनी आं। अ'ऊं ते छड़ी गेम
गै खेढ़नी आं। एहका फोन ते मम्मी ने मिगी छड़ा
गेम खेढ़ने आस्सै गै दित्ते दा ऐ।
- डॉ० : अच्छा, तां एहदा मतलब तूं टी.वी. नेई दिखदी ?

- पिंकी : टी.वी. ते अ'ऊं सिर्फ दो घेंटे गै दिक्खनी आं।
- डॉ० : मीना जी, जेकर पिंकी दो घेंटे टी.वी. दिखदी ऐ तां मोबाइल उप्पर किन्ना चिर खेढ़दी ऐ ?
(पिंकी झट्ट बोल्ली पौंदी ऐ)
- पिंकी : गेम ते अ'ऊं सिर्फ त्रैऽ घेंटे गै खेढनीं आं।
- डॉ० : (सिरै उप्पर हत्थ रक्खियै) भैन जी तुस सच गै आक्खा दियां ओ। पिंकी गी शरीरक कोई बमारी नेई ऐ।
- मीना : अच्छा, तां कीता-कराया गै होना। मिगी ते गुआढनीं उप्पर पैहलै गै शक्क हा।
- डॉ० : नेई भैन जी, पिंकी उप्पर तुं'दी गुआढनी दे भूतै दा साया नेई बल्कि मोबाइल ते टी.वी. दा साया ऐ।
- मीना : ऐं!
- डॉ० : लगातार टी.वी. दिक्खने ते मोबाइल उप्पर दो-त्रैऽ घेंटे गेम खेढने करी गै ते इसगी सिर पीड़ ते सिर चक्कर औंदे न। हून ओह दिन दूर नेई जदूं एहदी नजर बी घटन लगी पौग।
- मीना : अच्छा, (रोहै कन्नै पिंकी पाससै दिखदी ऐ) हून लायां तूं मोबाइल गी हत्थ। (ओहदे हत्थै चा मोबाइल खुस्सी लैंदी ऐ) अज्जै शा तेरा टी.वी. बी बंद।
- पिंकी : पर मम्मी तुस बी ते सारा-सारा दिन टी.वी. दिखदियां

रौंहदियां ओ। अच्छा, तां इससै करी तुसेंगी बी सिर
पीड़ होंदी ऐ।

मीना : (ढीठ होइयै नींदी मूंडी करी लैंदी ऐ) तूं चुप कर।

डॉ० : भैन जी, मोबाइल ते टी.वी. दा मता इस्तेमाल दमाग
ते शरीर दौने उप्पर माड़ा असर करदा ऐ। मेरे
स्थाबें तुसेंगी कुसै दवाई दी नेई बल्कि मोवाइल ते
टी.वी. दा इस्तेमाल घटाने दी मती लोड़ ऐ।

मीना : अच्छा। पर डॉ० साहब ज्याणें दा खेढने दा मन ते
करदा गै न?

डॉ० : भई, अ'ऊं कदूं खेढने गितै ठाकेआ ऐ, जेकर
खेढना गै तां टापू-लूता, छूने-छपाही, कीकली ते
होर सुद्धियां खेढां न जेहदे कनै ज्याणें दी सेहत
बी नरोई रौंहदी ऐ ते मनोरंजन बी होई जंदा ऐ।

पिंकी : (झट्ट बोल्ली पौंदी ऐ) पर मम्मी ते मिगी महल्ले
दे ज्याणें कनै खेढन गै नेई दिंदी।

डॉ० : जेकर ज्याणें गी तुस होरने ज्याणें कनै नेई खेढन
देगियां तां उं'दा सभाऽ चिड़चिड़ा होना लाजमी ऐ।
उ'आं बी किट्ठे रली-मिलियै खेढने कनै ज्याणें
च शरीरक कसरत दे कनै-कनै आपसी एकता ते
सैहनशीलता जनेह गुण बी सैहज गै आई जंदे न।
ते दमाग बी तेज होंदा ऐ।

(पिंकी खुश होंदी ऐ)

मीना : एह ते अ'ऊं कदें सोचेआ गै नेहा।

(ओह मुंहें उप्पर हत्थ रक्खियै खड़ोई जंदी ऐ, ते बाकी ज्याणें जेहड़े छिंडै बेहियै एहकी खेढ़ दिक्खा करदे हे ताड़ियां मारदे न)

सब्भै ज्याणे : चलो भई चलो हून चिर होआ करदा ऐ। हून कल खेढगे।

(आखदे होई चली जंदे न।)

अगला सीन

(कल थोहड़ा तौले पुजगे इस्सै बादे कन्नै कल सारे अपने-अपने घरें उठी गे हे। अज्ज टीना शैलू ते पिंगी सारें शा पैहलै पुज्जी गेदियां हियां इस करियै ओह होरनें दे औने तगर कीकली पान लगी पेइयां। त्रैवें इक दुए दा हत्थ फड़ियै बाहमां खिच्चियै तेज-तेज घूंकदे होई कीकली पान लगियां)।

त्रैवै : “कीकली कलील दी, पग्ग मेरे बीर दी, डप्पटा मेरी माई दा ते फेटे मूंह जुआई दा।”

सोनू : (औंदे गै) टीना शैलू पिंगी बस करो, इद्धर आओ किट्ठे खेढ़चै।

(बाकी ज्याणे बी पुज्जी जंदे न, ते ओह त्रैवै बी हत्थ छोड़ियै आई जंदियां न)

शैलू : अज्ज ते गुड्डी-गुड्डे दा ब्याह ऐ न ?

सोनू : हां, मीना तूं अपनी गुड्डी आंदी दी ऐ ?

मीना : हां। में ते आंदी दी ऐ पर गुड्डा कु'नै आहनना हा ?

- नीतू : में, मेरे कोल गुड्डी ते गुड्डा दोऐ हैन।
- मीना : चल ठीक ऐ, पैहलै अस द'ऊं हिस्सें च होई जनें
आं। इक कुड़ी आह्ला पास्सा ते इक मुड़े आह्ला।
- बबलू : ठीक ऐ।
- राजू : अ'ऊं गुड्डे दा बब्ब बनी जनां।
- शैलू : ठीक ऐ अ'ऊं गुड्डी दी मांऽ।
- नीतू : अ'ऊं गुड्डी दी स्हेली।
(इस चाल्ली सब्भै अपना-अपना रोल निश्चत करी
लैंदे न)
- शैलू : गुड्डी दे बापू, जान्नी पुज्जने आह्ली ऐ। अजें सारा
कम्म पेदा ऐ। कुड़े नीतू दिक्खेआं घ्यूर पक्के न जां
नेई मरहाजै गी केह खलागियां ?
- नीतू : घ्यूर बी पक्की गेदे न ते थाली च खंड ते दही
आह्ली कौली बी रक्खी ओड़ी दी ऐ। तुस फिकर
नेई करो।
(जान्नी ओंदी ऐ तां मिलनी आदि करियै जान्नी गी
रुट्ठी खलाने दा ते पही लामां फेरे कराने दा
अभिनय कीता जंदा ऐ। लामां फेरे करदे बाकी
ज्याणे सुहाग गांदे न)
- ज्याणे : मेरे बाबल जी बेदी दे बोलदे न तोते तुस बोलदे की
नेई ?
मेरे बाबल जी हून नेई आखेओ धीऽ साढ़ी हून
अ'ऊं होई आं पराई...।

(फही गुड़िया गी बरधांदे होई सारे गुड़िया दे गलें
लगदे न ते फही उसगी सौहरै घर भेजी दित्ता जंदा
ऐ।

(तुआंह गुड़िया अपने सौहरै पुज्जी जंदी ऐ)

टीना : पजैकी आई गई, पजैकी आई गई।

डॉली : एह् पैहलै दरोआजे च तेल चुआई लैन देओ
(डाली तेल चोआने दा अभिनय करदी ऐ ते फही
पानी बारने दा अभिनय कीता जंदा ते बाकी ज्याणे
गीत गांदे न)

ज्याणे : जे तूं आंदड़ी ऐ बे मल्ला फ्हाड़ै मटेआर माए पीता
बाहर जे तू....

इ'यां गै लाड़ी गोरी ऐ गोरी ऐ गोरी ऐ असें शुकर
कीतां माऊ टोरी ऐ लाड़ी लम्मी ऐ, लम्मी ऐ,
लम्मी ऐ असें शुकर कीता माऊ जम्मी ऐ।

(फही अंदर आह्नियै गुड़डी गी ब्हाली दित्ता जंदा
ऐ। जनानियां लाड़ी दिक्खन औन लगदियां न।
लाड़ी दिक्खने परैन्त जनानियां थोहड़ा छिंडै बैठी
दी डॉली कोल जंदियां न)

टीना : भैन जी ममारखां न, लाड़ी ते बड़ी गै शैल ते उच्ची
लम्मी ऐ। भई तुस ते बड़े भागें आह्ले ओ।

मीना : लाड़ी ते शैल ऐ, (बल्लें जनेही डॉली दे कोल
आह्नियै) पर दाजै च केह-केह आया ऐ। तुसें ते
कुतै भिनक बी नेई लगगन दित्ती।

- डाली : (रोहै कन्नै चिढ़ियै) आहो तुस्सै लेई जाओ जेहड़े
घोड़े लखियै इन्नै आंदे न।
- टीना : इ'यां कीऽ आखदियां ओ भैन जी, लाड़ी शैल ऐ,
सज्जजी ऐ ते कन्नै नौकरी बी करदी ऐ। होर केह
लोड़दा तुसेंगी ?
- डॉली : मेरा पुत्तर केहड़ा कुसै शा घट्ट ऐ, बड़्हा अफसर
ऐ लगगे दा। असेंगी कोई रिश्ते दा घाटा थोहड़े हा
पर...
- पिंकी : भई अ'ऊं ते तुं'दे बत्थहेरे तरले कीते हे जे मेरी
नूहै दी भैन ब्याही लैओ, पर तुं'दा ते नक्क गै
सिद्धा नेहा होंदा। तुं'दा मुड़ा ते आखदा हा कुड़ी
पढ़ी-लिखी दी गै चाहिदी ऐ। अ'ऊं बगैर दाजै
ब्याह करी लैड।
- डॉली : (सूंक सुट्टियै) केह सनांऽ, भैन जी कुर्ता पुट्टो ते
अपना गै टिड्ड नंगा होंदा ऐ। मेरी इस घरै च
सुनदा गै कु'न ऐ?
- पिंकी : मेरी नूह बशक्क पढ़ी-लिखी दी नेई ऐ, जीहभा बी
खौहरी ऐ, पर तुसेंगी ते पता गै नानकिये तगर सुन्ने
दे सैट पाए हे उ'नें, ते दाजै दा ते कोई धुर बन्ना
गै नेहा छोडेआ। Plot सै बक्खरा।
- डॉली : कुड़े असेंगी केह पता हा एहदे भुक्खे मांऽ-बब्ब
इसगी इ'यां गै खाल्ली हत्थें डंडे बजांदे कइडी
लाडन। अ'ऊं ते सोचेआ हा दाज नेई तां कोई

Plot, गड़्डी जां नकदी गै देई ओड़ङन पर.....।

(तुआंह माऊ ते होरनें जनानियें दियें गल्लें दी
अबाज जिसलै गुड्डे तगर पुज्जी तां गुड्डे दी
तरफा राजू बोलदा ऐ)

राजू

: मांऽ जी, केह गल्ल? इस घरै च कुसै चीजै दी
थोड़ ऐ ?

(मांऽ चुप रौंहदी ऐ, राजू होरनें जनानियें कन्नै
मखातिफ होइयै)

मेरी इन्नी कमाई ते ऐ जे अ'ऊं अपने परोआरै
दा शैल चाल्ली पालन-पोशन करै करना, ते मेरी
लाड़ी समझदार पढ़ी-लिखी दी नौकरी बी करदी
ऐ। मिगी पूरा जकीन ऐ जे एह होरनें किश
अनपढ़ जनानियें आंगर अपने दाजै दे मानै कन्नै
घरै च बखैद निं पाग ते मेरे माऊ-बब्बै दी इज्जत
ते सेवा बी करग। मिगी दाजै दी नेई बल्कि इक
समझदार साथी दी लोड़ ही। जेह्ड़ी पूरी होई
गेई।

(दोऐ हत्थ जोड़ियै)

मिगी माफ करेओ, पर जेकर तुसें साढ़े घर आहनियै
दाजें-दानें दा बखान करना ऐ तां एह गल्लां सुनने
दी साढे कोल बेहल नेई ऐ।

(इक ज्याणा इस गल्ला कन्नै सैहमती जतांदे होई
उट्ठी खड़ोन्दा ऐ ते आखदा ऐ।)

ज्याणा : ठीक आक्खेआ ऐ इसनै।

(बाकी सारे बी उसदे कन्नै रलियै हाम्मीं भरदे
लोकें कन्नै मखातब होइयै किट्ठे बोलदे न।)

सब्भै ज्याणें : ठीक! भलेयां ठीक। सोलां आन्ने ठीक।

-0-





पच्छोताऽ

पात्तरें दा परिचे

पात्तर	बरेस
1. मर्द	80 ब'रे
2. जनानी	70 ब'रे
3. रघु	48 ब'रे
4. लाड़ी	42 ब'रे
5. संजू	10 ब'रे
6. जोती	12 ब'रे
7. पिंटू	11 ब'रे
8. पप्पू, रवि, साहिल ते पप्पू दी भैन	10 ते 12 ब'रे बशकार
9. पप्पू दी मांऽ	40 ब'रे
10. पिंटू दी मांऽ	लगभग इन्नी गै बरेस
11. पिंटू दे पिता	44 ब'रे
12. बुड्डी दादी	75 ब'रे
13. चाचा	38 ब'रे
14. महल्लेदार	35एं ते 55 बशकार



पच्छोताऽ

[मंच उप्पर किश घरै दा समान निक्कड़-छुक्कड़ पेदा ऐ, ते इक भेट्ठा मेजा पर लैंड लाईन टेलीफोन बी पेदा ऐ। इसदे कन्नै घरा दी रैहत्-बैहत् दा पता चलता ऐ। लगभग 80 एं बर्रिं दा इक बजुर्ग ते ओहदी घरै आहली बैठे दे न। बजुर्ग दे पैं गी गर्म पट्टी बज्झी दी ऐ शायद पैं गी लग्गी दी ऐ, पर उ'आं ओह् सेहतू खरा नरा-नरोआ से'ई होंदा ऐ। ओह्, रुट्टी खा करदा ऐ ते घरै आहली कोल बेहियै पक्खी झोल्लै करदी ऐ]

जनानी : बस गर्मियां शुरू होइयां न ते बिजली दे कट्ट शुरू। बड्डलै-बड्डलै गै दिक्खो हां किन्नी गर्मी होई गेई ऐ।

मर्द : भलिये लोकें गर्मियें च गर्मी निं होऐ ते केह् बर्फ पबै?

जनानी : भई, तुस ते मुंहा गल्ल गै नेई कड्डन दिंदे। पर केह् मजाल ऐ जे उप्परै आह्ला (उप्पर दिखदे होई) बिंद कणी गै सुट्टै। पशु-पक्खरू बी गर्मी कन्नै त्रेहाए दे मरै करदे न।

मर्द : उप्परै आहले गी कीऽ घोखनी ऐं। कबुद्धां करो तुस लोक ते कणियां सुट्टै ओह। उ'नै जि'यां आक्खो कणियां गंडी ब'न्नी दियां होन?

जनानी : हून अ'ऊं केहड़ी कबुद्ध करी ओड़ी ऐ, जे परमात्मा
दी गंढी कणियां गै सुक्की गोइयां। बरखा नेई ब'रारदी
तां भला एह्दे च मेरा केह कसूर ?

मर्द : तूं होएं ते भाएं कोई होर। पर कसूरबार ते मनुक्ख
गै न।

जनानी : तुस बी स'तरी-ब'तरी गेदे ओ, भला एह्दे च
मनुक्खै दा केह दोश ?

मर्द : मनुक्खें दा दोश नेई तां होर कोह्दा ऐ ? अपने
लालचें रुक्ख-बड्डी-बड्डी धरती परा बनें दे बन
खाल्ली करी सुट्टे दे न, पर अपने हत्थें बूह्टा लाना
कुसै भाखा नेई। फही भला बरखा कुत्थुं होऐ ?

जनानी : गल्ल ते तुस ठीक आक्खा करदे ओ।

(मर्द रुट्टी खाइयै चूटी करने दा अभिनय करदा ऐ
ते जनानी थाली चुक्कन गै लगदी ऐ जे इन्ने चिरै गी
इक पाससै मेजै उप्पर पेदे टैलीफोनै दी घेंटी बजदी
ऐ। दौनें दा ध्यान फोनै आह्लै पाससै जंदा टुरी ऐ।
दोऐ इक-दूए आससै दिखदे न ते फही जनानी थाली
इक पाससै छोड़ियै फोन चुक्कने आसतै उठदी ऐ।)

मर्द : जेकर रघु दा फोन होआ तां उसगी मेरे पैंरै बारै किश
निं दस्सेआं। ऐहमें गै खाह-मखाह परेशान होग।

(जनानी फोन दा रिसीबर चुकदी ऐ तां मंच दी
रोशनी दा घेरा सिमटियै उसदे पर पौन लगदा ऐ।
मर्द बी उस घेरे च जनानी दे कोल आई जन्दा ऐ।

मंच दे दूए पाससै बी इक गोलाकार रोशनी बनदी ऐ
ते उसदे च संजु टैलीफोन समेत लभदा ऐ।)

जनानी : हैलो।

संजु : हैलो चरण बन्दना, दादी, अ'ऊं संजू बोल्लै करना।

जनानी : जींदा रौह पुतरा, बड्डा-2 ओ, केह हाल ऐ
तेरा ?

संजु : दादी अ'ऊं ते ठीक आं पर....

जनानी : (काहली पेई जंदी ऐ) पर केह पुतरा बोल, तौला
बोल सारे ठीक न नां ?

संजु : दादी डैडी दा स्कूटर इक बस्सै कन्नै बज्जा ते डैडी
दी बांह भज्जी गई, तुस तौले आई जाओ।

(जनानी कोला उत्थै गै बन्होई जंदा ऐ, ते ओहदा
मूंह सुक्की जंदा ऐ)

जनानी : तेरी मांऽ कुत्थें ऐ। ओहदे कन्नै गल्ल करा हां।

मर्द : केह होआ ?

संजू : मम्मी डैडी कोल हस्पताल गेदी ऐ। तुस तौले आई
जाओ।

(ओह फोन कट्टी ओड़दा ऐ ते जनानी सिरै उप्पर
हत्थ रक्खियै बेही जंदी ऐ। मंच दी रोशनी फही
पैहले आंगर होई जन्दी ऐ।)

मर्द : (मर्द बी परेशान होई जंदा ऐ) :

में आखेआ होआ केह ऐ ?

- जनानी : होना केह हा, उ'ऐ जेहदा मिगी डर हा।
- मर्द : उ'आं किश बोलगी बी जां नेई।
- जनानी : अ'ऊं नेही तुसेंगी सना करदी जे अज्ज मिगी किश
चंगा सुखना निं आया, मेरा ते बडले दा गै काह्ला
जी पवै करदा हा।
- मर्द : (खिंझियै) होआ केह ऐ ?
- जनानी : संजु दा फोन हा, आक्खै करदा हा रघु दा स्कूटर
कुसै गड्डी कन्नै बज्जेआ ते ओहदी बांह भज्जी गई।
पता नेई उसगी होर किन्नी लग्गी दी ऐ।
- मर्द : (मर्दै गी शक्क पौंदा ऐ) फोन संजु ने कीता ? तां
लाड़ी कुत्थै ही ?
- जनानी : कैसियां भोलियां गल्लां करदे ओ ? लाड़ी नै घर
बौहना हा? संजू आक्खै करदा हा ओह बी हस्पताल
गेदी ऐ।
- मर्द : अच्छा। तूं काहली निं पौऽ। संजु इ'यां गै पुटिठयां-
सिद्धियां गल्ला करदा रौंहदा ऐ। ज्याणा जे होआ।
- जनानी : बशक्क ज्याणा ऐ, पर ओह एड्डा-बड्डा झूठ
थोहड़े बोल्लै करदा होना ऐ।
- मर्द : खरा, तां जा आपूं जाइयै पता लेई आ।
- जनानी : पर तुस.....?
- मर्द : त्रकालें परतोई आमेआं। मिगी किश नेई होंदा, अ'ऊं
ठीक आं।

जनानी : खरा, कुसैगी जाना ते पौना ऐ। (उट्ठी पौंदी ऐ)
 मर्द : दिक्खी-सुनियै जायां। दिक्खेआं कुतै काहले पेदे
 'राम नाम सच्च' निं होई जा।

जनानी : मेरा 'राम नाम सच्च' होई बी जाग तां केह ऐ।
 अ'ऊं खाई पीऽ लेदा ऐ। मिगी ते रघु दी चैंता ऐ
 ओहदा पता निं केह हाल ऐ ? तुसैगी किश लोड़चदा
 होग तां कन्ने आहली भोली गी आला देई लैएओ।

मर्द : अच्छा-अच्छा, तूं मेरी चैंता नेई कर, अगड़ी जा।
 उप्परा तुप्प भखा करदी ऐ।

(जनानी उठी जंदी ऐ। मंच दी रोशनी फेड आऊट
 होन्दी ऐ ते फिरी फेड इन होन्दी ऐ। रघु दे घरा दा
 दक्ख सामनै औंदा ऐ। तुआंह रघु दा घर संजु ते
 जोती दोऐ ज्याणे दादी दे औने दी हीखी च हुतले
 होए दे पलै-पलै गेटै कश औंदे ते झांकी मारियै फही
 परतोई जंदे। इस बारी दादी गी औंदे दिक्खियै जोती
 संजु गी आला दिंदी ऐ)

जोती : संजू तौले बाहर आ, दादी आई गई।
 (संजू दौड़ियै बाहर औंदा ऐ)

संजू : कुत्थें ऐ ?

जोती : (दादी आस्सै शारा करांदे होई)
 -ओह दिक्ख।

(संजू ते जोती दोऐ दौड़ियै दादी दियें लत्तें कन्ने
 चमकी जंदे न। दादी बारी-बारी दौनें दे सिरें उप्पर

हथ फेरियै लाड़ करदी ऐ ते फही फरूटै आहला
लफाफा जोती गी पकड़ाइयै। रघु बारै पुछदी ऐ।)

जनानी : पुतरा, रघु दा केह हाल? ओह घर आया जा नेई?
(दोऐ ज्याणे दादी दा हथ फड़ियै अंदर लेई औंदे
न)

जोती : (हरानी कन्नै) दादी, डैडी ने कुत्थुं औना हा ? ओह
ते बड्डले दे गै घर न!

जनानी : पर संजू ते।

(अंदरा उं'दियां गल्लां सुनियै रघु ते ओहदी लाड़ी
मंच उप्पर औंदे न ते जनानी दे पैरें हथ लाइयै लाड़ी
रसोई चाई-पानी दा सरिस्ता करन उठी जंदी ऐ ते
रघु मांऽ कश बेहियै हरानी कन्नै पुछदा ऐ।)

रघु : मांऽ जी तुस इन्नी धुप्पा ? जेकर औना हा तां फोन
करी ओड़दियां, अ'ऊं अड्डे उप्पर गै आई जंदा
तुसेंगी लैन ?

जनानी : पुतरा तूं ठीक ऐं न ? तेरी बांह ठीक ऐ न ? (रघु
दी बाह्मां उप्पर हिरखै कन्नै हथ फेरदी ऐ)

रघु : मेरी बांहमें गी केह होना हा ? अ'ऊं ठीक आं, पर
बापू जी कोल कु'न ऐ। ओह ठीक न नां ?

(शशोपंजें च पेदी जनानी इक बारी रघु दी बाह्में
आस्सै ते इक बारी संजु आस्सै दिखदी सेही करी
जंदी ऐ जे संजु ने उस कन्नै झूठ बोल्ले दा ऐ।
अपनी चोरी पकड़ोंदे दिक्खियै बब्बै शा डरदा संजू

झट्ट उतूँ खिसकी जंदा ऐ। इन्ने चिरें लाड़ी पानियै
दा गलास लेइयै जनानी गी पकड़ांदी ऐ)

रघु : (माऊ गी सोचें पेदे दिक्खियै) केहू गल्ल मांस, जी
केहू सोचै करदियां ओ ?

जनानी : पुतरा अज्ज बड्डलै संजू ने फोन कीता हा जे तेरा
अक्सीडेंट होई गेदा ऐ ?

रघु : (हरानी कनै) संजू ने फोन कीता जे मेरा...?
(लाड़ी आस्सै रोहै कनै दिखदे होई)

जनानी : हां।

रघु : इन्नै गै उसी सिर चाढ़े दा ऐ। जेकर उसगी किश
आक्खो तां झट्ट बिच्च पेई जंदी ऐ। अजें ज्याणा ऐ।
एहू ज्याणें आहले कम्म करदा ऐ ?

लाड़ी : मांस जी गल्ल ते सच्च ऐ, अज्जकल आ'मी दिक्खै
करनीं आं, संजू किश झूठ बोलन लगी पेदा ऐ। पर
अ'ऊं थोहड़े उसगी आखनीं आं जे झूठ बोल्लै कर।

रघु : (रोहै च जोरें आला देइयै) सजू इद्धर आ हां।

जनानी : जागतै गी मेरे सामनै किश निं आखेआं अ'ऊं आपूं
समझाड उसगी। ओहू इ'यै जनेहा ते नेहा।

(संजू झकदा-झकदा औंदा ऐ ते उसगी दिक्खियै रघु
गी होर रोहू चढ़ी जंदा ऐ ते ओहू उसगी मारने त्वेई
उट्ठन गै लगदा ऐ तां जनानी उसगी बाहंमा दा
फड़ियै ब्हाली ओड़दी ऐ। ते रघु गी चुप रौहने दा

शारा करदी ऐ, फही संजू गी अपने कश सद्धियै गोदा
च ब्हालियै लाडै कन्नै किश पुच्छन लगदी ऐ तां रघु
उटिठयै बाहर निकली जंदा ऐ ते पिच्छै-पिच्छै लाड़ी
बी उठी जंदी ऐ)

जनानी : संजू पुतरा तूं ते मिगी...

संजू : (रोने आह्ला मूंह बनाइयै कन्न पकड़दा ऐ) सारी
दादी। अ'ऊं किन्ने बारी डैडी-मम्मी गी आखेआ हा
जे मिगी दादी-बाबे कश लेई चलो, पर, एह रोज
गै एह आक्खियै टाली ओड़दे न जे फही कुतै जागे।
तां फही तुस्सै दस्सो अ'ऊं केह करदा। मिगी तुंदा
मंदा लगगे दा हा।

(ते ओह दादी दी गोदा च लेटी जंदा ऐ, कश बैठी
दी जोती बी मुंडी ल्हाइयै उसदी गल्लै दी गबाही
दिंदी ऐ। दादी लाडै कन्नै दौने दे सिरै उप्पर हत्थ
फेरदी ऐ)

जनानी : बच्चू, जेकर तुसेंगी मंदा लगगे दा हा तां फही मिगी
सच्च-2 सनांदे, अ'ऊं तां बी आई जंदी। भला झूठ
बोलने दी केह लोड़ ही ?

जोती : दादी ठीक आक्खै करदियां न संजू।

जनानी : (जनानी उच्ची अबाजै च आखदी ऐ) रघु पुतरा
बब्बै अपने गी टेलीफोन करियै सनाई ओड़ेयां सब-
ठीक ऐ। ऐहमें जानी फिकरमंद रौहडन। अगगै गै
उं'दे पैरै गी मरोड़ लगगे दा ई आ।

- रघु : अच्छा मांऽ जी।
- संजू : दादी, बाबा जी दे पैरै गी मरोड़ लागे दा ऐ तां फही तुस कीऽ आइयां ?
- जनानी : बच्चु, जिसलै तूं आखेआ जे डैडी दी बांह भज्जी दी ऐ तां अ'ऊं काहली पेई गेई, तां तेरे बाबा जी ने मिगी झट्ट पता लैने गितै भेझी दित्ता। ते अ'ऊं काहली पेदी धुप्पा गै जलदी-फकोंदी उट्टियै टुरी पेई।
- जोती : संजू अ'ऊं तुगी आखनी आं न, जे झूठ नेई बोलना चाहिदा। दिक्खेआ ?
- जनानी : बच्चू। तुसेंगी पता ऐ झूठ बोलने दी केह सजा थोंदी ऐ?
- दोऐ ज्याणे : केह सजा थोंदी ऐ दादी ?
- जनानी : अ'ऊं तुसेंगी इक बारी दी गल्ल सनानी आं।
- दोऐ ज्याणें : (सामनै बाँहदे होई उत्सुकता कनै) सनाओ दादी।
- जनानी : इक ग्रांऽ च इक पिंटु नांऽ दा बड़ा गै शतूना जागत रौंहदा हा। ओह बड़ा गै झूठा ते कनीती हा। पैरै-पैरै उप्पर झूठ मारना ते ओहदी खोऽ बनी गेदी ही। एहदे शा बी माड़ी गल्ल एह ही जे ओहदे मांऽ-बब्ब बी ओहदे झूठै च ओहदा पूरा साथ दिंदे हे। फही इक रोज केह होआ जे महल्ले दे ज्याणें कनै खेढ़दे-खेढ़दे कनीती पिंटु पप्पू गी धिक्का मारदा ऐ, जिस करी पप्पू डिगगी पौंदा ऐ ते उसदा सिर भुजां

पेदी लकड़ी कनै बजदा ऐ तां उसदे मत्थे उप्परा
 खूनै दा सुम्ब निकली पौंदा ऐ। पप्पू दे मत्थे उप्परा
 खून बगदा दिक्खियै पिंटु उत्थूं नस्सियै घर आई जंदा
 ऐ ते फही...

(सनांदे-सनांदे Flash Back च चली जंदी ऐ।
 Flash Back दा दक्ख। स्टेज उप्पर पिंटु दी मांऽ
 ब्हारी फेरने दा अभिनय करा करदी ऐ ते दुए
 पासेआ रोने दा डॉम करदा पिंटु माऊ कोल औंदा
 ऐ)

पिंटु : मांऽ, ढक्की आहलें दे पप्पू ने मिगी मारेआ।
 मांऽ : (पिंटु आस्सै दिखदे होई, ब्हारी छोड़ी ओड़दी ऐ
 ते फही लाडै कनै आखदी ऐ) आ मेरा बच्चा
 (दर्शकें कनै मखातिफ होइयै) इ'दा बेड़ा रूढै।
 इ'नें महल्ले आहलें ते मेरे जागतै गी ते (पिंटु दे
 सिरै उप्पर हत्थ फेरदी ऐ ते पिंटु माऊ गी कलावा
 मारने दा अभिनय करदा ऐ) नजरें चाढ़ी लैते दा
 ऐ, बचैरे गी जीन गै नेई दिंदे। भलमानसी दा ते
 जमाना गै नेई रेहदा। जिस्सी दिक्खो घोड़े उप्पर
 सुआर होइयै मेरे जागतै उप्पर चढ़ी पौंदा ऐ। बस!
 बड़ा होई गेआ। (जागतै दा हत्थ पकड़ियै त्रारे
 कनै) चल पिंटु, चल हां अज्ज अ'ऊं पप्पू दी माऊ
 दे चूँडै पलेस पांऽ।

(ओह दोऐ जान गै लगदे न जे इन्ने चिरें गी पप्पू
 गी फड़े दे उसदी मांऽ ते भैन दोऐ उत्थै पुज्जी

जंदियां न। पप्पू दे मत्थे उप्परा खासा खून निकले
दा हा।

पप्पू दी मांस : (पिंटु दी मांस गी सम्बोधत करदे होई) भैन जी,
दिक्खो हां तुंदे जागतै मेरे पप्पू दा सिर गै फाड़ी
सुट्टे दा ऐ तुस इसगी....

(उ'नै अजें गल्ल पूरी बी नेई ही कीत्ती दी जे पिंटु
दी मांस पूरी गल्ल सुने बगैर गै ओहदे उप्पर ब'री
पौंदी ऐ)

पिंटु दी मांस : (सुआंग लांदे होई) सिर गै फाड़ी सुट्टे दा ऐ। खरा
होआ तूं आपूं आई गेई ऐ नेई तां जारदी ही इस
(पप्पू आस्सै शारा करांदे) मोए गी पिट्टन। एह
नित्त त्रिऐ रोज मेरे जागतै गी मारदा ऐ।

पप्पू दी मांस : लैओ भई, कन्नै चोरी ते कन्नै, सीना-जोरी। मारेआ
तेरे जागतै ते....

(फही बिच्च गै टोक्कियै बोलदी ऐ)

पिंटु दी मांस : खबरदार जेकर मेरे जागतै उप्पर इल्जाम लाया। मत
कुसै दी गिज्जी दी जाएं।

पप्पू दी मांस : (इस बारी किश खौहरे होइयै) भैन जी, तुसेंगी खून
(पप्पू दे मत्थे आस्सै शारा करांदे होई) बगदा बी नेई
लब्बै करदा। किश ते उप्परै आहले दा खौफ खाओ।

पिंटु दी मांस : (गल्ल फेरदे होई) पता निं कुत्थुं करीट लोआई
आए दा ऐ, (किश ढिल्ली पेई जंदी ऐ) ते मत्थे
साढ़ै मड़ा दा।

पप्पू दी भैन : चाची, बीर गी पिंटु ने मेरे सामनै गै धिक्का मारेआ
हा, ते बीर दा सिर लकड़ी कन्नै बज्जी गेआ।

पिंटु : (झूठ पकड़ोंदा दिक्खियै झट्ट बोली पौंदा ऐ) नेई
मांऽ एह झूठ बोल्लै करदी ऐ।

पिंटु दी मांऽ : मिगी पता ऐ। एह सप्पै दे गवाह डिड्डूं। बड़ा होई
गेआ। बड़ियां आईयां तुस मां-धीऽ एहदी गुआई
देन। चलो-चलो निकलो इत्थूं। ऐहमें जानी मेरा मुंह
खलादियां ओ।

(पप्पू दी मांऽ ते भैन पप्पू गी लेइयै परतोन लगदियां
न तां पिंटु त्रेड्डी अक्खीं कन्नै पप्पू आस्सै दिक्खियै
मस्कांदा ऐ तां बेबस पप्पू चुप-चाप परतोई जंदा ऐ
तुआंह पिंटु दी मांऽ उ'नेंगी परतोदे दिक्खियै किश
चिर बुड़-बुड़ करदी ऐ ते पही पिंटु गी खेढ़ने गितै
आखदी ऐ)

पिंटु दी मांऽ : जा बच्चा, जा खेढ़ जाइयै।

पिंटु : मांऽ दिक्खेआ, किन्ने चुगलखोर न ?

पिंटु दी मांऽ : अच्छा-2 में आखेआ न, जा तूं खेढ़ जाइयै। आ'मीं
अंदरा दा कम्म मकाई लैं। अजें सारा त्राड़ पेआ ऐ।
(पिंटु दी मांऽ स्टेज उप्परा उठी जंदी ऐ ते पिंटु
जि'यां घरा बाहर निकलदा ऐ उसगी रवि ते साहिल
सन्तोलिया खेढ़दे लभदे न। पिंटु झट्ट उ'दे कोल
उठी जंदा ऐ)

पिंटु : रवि, यरा मिगी बी खढाई लैओ।

(रवि ते साहिल दोऐ पिंटु आस्सै दिखदे न)

रवि : न भ्रावा, असें नेई खेढ़ना तेरे कन्नै, तूं रोल पान्ना ऐं।

पिंटु : में कदूं रोल पाया ? अच्छा चल हून रोल नेई पाड।
लैओ खढाई लैओ मिगी बी।

साहिल : (अगै होइयै) दिक्ख पिंटु तूं आऊट होइयै बी नेई मनदा। झूठियां सगधां बी चुक्की लैन्नां ऐ। ते फही जेकर कोई किश आक्खै तां लड़ाई गी आई जन्नां ऐ। अ'ऊं तेरे कन्नै कदें बी नेई यों खेढ़दा।

रवि : छोड़ जरा साहिल (साहिल दा हत्थ फड़ियै लेन लगदा ऐ) असें इस्सी नेई खढ़ाना। चल अस दोऐ खेढ़चै।

पिंटु : (लिंथा मूंह बनाइयै) साहिल अ'ऊं तुंदे कन्नै बादा करनां जे आऊट होने उप्पर रोल नेई पाड। कन्नै भुगने दी बी लोड़ नेई। अ'ऊं खीरी बारी लेई लैड।
ठीक ऐ?

(साहिल रवि आस्सै दिखदा ऐ पर रवि कोई हां नां नेई करदा तां साहिल बोलदा ऐ)

साहिल : रवि चल इस्सी बी खढाई लैनें आं, ऐ ते पिंटु बी साढ़ा दोस्त गै न।

रवि : चल तूं आखनां तां ठीक ऐ।

(पिंटु खुश होई जंदा ऐ ते त्रैवै खेढन लगगी पौंदे न।
पैहली बारी रवि लैंदा ऐ, दूई बारी साहिल दी औंदी

ऐ ते त्रीऽ बारी पिंटु दी औंदी ऐ। पिंटु गेंद सुटदे गै
 आँऊट होई जंदा ऐ। उसगी बड़ा रोह चढदा ऐ पर
 ओह चुप्प रौंहदा ऐ ते हून परतियै रवि खेढ़न लगदा
 ऐ। रवि गी आँऊट नेई होंदे दिक्खियै पिंटु दा रोह
 काबू शा बाहर होई जंदा ऐ ते ओह गेंद चुक्कियै
 रवि गी मारने दी मनशा कन्नै जोरै दा नशाना ओहदे
 सिरै उप्पर मारदा ऐ। पर रवि फुर्ती कन्नै झट्ट नौंदा
 होई जंदा ऐ ते गेंद कोलें लंघै करदी इक बजुर्ग
 जनानी दे सिरै गी बज्झी जंदी ऐ। जनानी चक्कर
 खाइयै भु'जां डिग्गी पौंदी ऐ। पिंटु जनानी गी डिग्गदे
 दिक्खियै उत्थुं उड्ड-पत्तर होई जंदा ऐ, पर रवि ते
 साहिल दौड़ियै उस बजुर्ग जनानी गी ठुआलने दे
 जतन करदे न।)

साहिल : (जनानी गी ल्हांदे होई) दादी-दादी उट्ठो। कुत्थें
 लगगी तुसेंगी ?

रवि : उट्ठो-उट्ठो दादी।
 (ते पैर तलसन लगी पौंदा ऐ इन्ने चिरे बुड्डी
 बल्लें-बल्लें जनेही उट्ठने दे जतन करदी ऐ)

बुड्डी : हाय, हाय ओए मारी ओड़ेआ ई। अवै कोहदे ओ
 तुस नेह बिगड़े दे बक्खर ज्याणे। बुड्डे-ठेहरें दा बी
 लेहाज नेई तुसेंगी।

(बुड्डी बल्लें-बल्लें बेही जंदी ऐ ते साहिल ते रवि
 उसगी स्हारा देइयै बुहालन लगदे न)

साहिल : दादी असें कोई जानियै थोहड़े गेंद मारेआ, ओह ते
पिंटु कोला...

(साहिल पिंटु आस्सै दिक्खन लगदा ऐ तां उसगी
पता लगदा ऐ जे ओहदी ते कुतै बाता-लोऽ बी नेई
लग्गार'दी। इच्चरै गी रवि साहिल गी शारा करांदा
ऐ)

रवि : साहिल, ओह दिक्ख!
(तुआंह पिंटु बुड्डी दे पुतरै गी लेइयै आवै करदा
हा)

पिंटु : (दूरा गै) चाचा, ओह दिक्ख, रवि ने दादी गी गेंद
मारी। ते दादी ओह डिग्गी पेदी।

चाचा : (अगै होइयै बुड्डी गी तुआलदा ऐ) मांऽ जी!
कुत्थें लग्गी तुसेंगी ?

बुड्डी : पुतरा सिरै गी।
(सिरै उप्पर हत्थ रखदी ऐ, चाचा रवि ते साहिल
आस्सै दिखदा ऐ।)

साहिल : चाचा, दादी गी रवि शा नेई पिंटु शा गेंद बज्जी ही।
अस ते सगुआं...

पिंटु : (झट्ट बिच्च गै बोल्ली पौंदा ऐ) चाचा अ'ऊं तुसेंगी
पैहलै गै आखेआ हा न, इ'नें दौनें मेरा गै नांऽ
चाढ़ना ऐ। अ'ऊं ते इ'दे कनै खेड्ढा दा गै नेहा।
भाएं मम्मी गी पुच्छी लैओ। (घरै आस्सै शारा
करांदा ऐ) जेल्लै अ'ऊं घरा निकलेआ तां अ'ऊं

दौनें गी गल्लां करदे सुनेआं, आखवै करदे हे दिक्खनेआं जे दादी गी कोहदा नशाना पैहलै लगदा ऐ। इन्नी गल्ल आखदे गै रवि ने नशाना लाई बी ओड़ेआ। ते अ'ऊं तुसेंगी सद्दन उठी गेआ।

रवि : (पिंटु कन्नै मुखातिफ होई) पिंटु तूं ते बादा कीता हा जे अ'ऊं झूठ नेई बोलड ते हून एड्डा-बड्डा झूठ बोळै करनां ऐं ?

पिंटु : हुँ (परै मूंह करी ओड़दा ऐ) दिक्खेआ चाचा ?
(रवि ते साहिल दी गल्ल सुनियै चाचा समझी गेदा हा जे ओह दोऐ सच्च बोळै करदे न।)

चाचा : दिक्खो बच्चो, गेंद भाएं कुसै शा बी बज्जी होऐ। पर सोचो जेकर मांऽ जी गी कुतै होर जोरै दी बज्जी जंदी तां इंदे ते प्राण गै निकली जाने हे। इस करियै अगै- पिच्छै दिक्खियै कुतै इक पाससै खेड्डै करो। रस्ते च नेई।

(चाचा बुड्डी गी लेइयै स्टेज उप्परा उठी जंदा ऐ)

(Flash Back End)

(फही संजू ते जोती दादी कोल बैठे दे स्टेज उप्पर लभदे न)

संजू : दादी फही केह होआ ?

दादी : होना केह हा ? फही सब्भै ज्याणें अपने-अपने घर उठी गे, पर पिंटु गी हून अपने कन्नै कोई बी नेहा खढांदा, कोई बी ओहदी गल्लै उप्पर जकीन नेहा

करदा। हून लोक उसगी पिंटु नेई बल्कि झूठा पिंटु
आखन लगी पेदे हे।

जोती : दादी उस पिंटू नै होर केह-केह कीता ?

दादी : फही इक रोज ओहदे मांऽ-बब्ब कुतै कम्म-काज
लगे दे हे तां पिंटु इक्कला गै खेढ़न लगा, खेढ़दे-
2 ओहदे हत्थ तीलें आहली डब्बी लग्गी। ते फही
(संजू जोती ते दादी स्टेज उप्परा उठी जंदे न ते पिंटु
खेढ़दा-खेढ़दा औंदा ऐ Flash Back)

पिंटु : हैं! तीलें आहली डब्बी! (चुक्कियै तांह-तुआंह
दिक्खदा ऐ) एहदा केह कीता जा। चल सफाई करना।
(किश चिर सोचने दा अभिनय करदा ऐ ते फही
किश कागज-पत्तर किट्ठे करियै उ'नेंगी अगग लांदा
ऐ। जिसलै अगग बलदी ऐ ते उसगी दिक्खियै उसगी
झट्ट शरारत सुझदी ऐ। ओह रौला पाई ओड़दा ऐ)
अगग, अगग, अगग लग्गी गई...

(महल्ले दे लोकें जिसलै ओहदा रौला सुनेआ तां
लोक झट्ट दौड़दे उत्थै किट्ठे होई गे)

इक महल्लेदार : कुत्थै अगग ?

दूआ महल्लेदार : (हफे दे) कुत्थें लग्गी अगग ?

(लोकें दे किट्ठै गी काहले पेदे दिक्खियै पिंटु
हस्सन लग्गी पौंदा ऐ ते फकोंदे कागजें आस्सै शारा
करांदा ऐ)

पिंटु : एहां लग्गी दी अगग।

इक होर : (रोहै कन्नै) पिंटु, तुगी शर्म निं औंदी इस चाल्ली
महल्लेदार झूठ बोल्लियै महल्ले आहल्लें गी मूर्ख बनांदे।

दूआ महल्लेदार : सच आक्खै करदे ओ भाई जी, मूर्ख ते अस आं
जेहड़े इस दा रौला सुनियै दौड़ी आए। एह ते ऐ गै
सिरे दा झूठा ऐ।

(लोकें दा रौला सुनियै पिंटु दे मां-बब्ब बी स्टेज
उप्पर आई जंदे न। महल्लें आहल्लें गी पिंटु उप्पर
रोहें होंदे दिक्खियै मांऽ पिंटु गी लाड़ लान लगी
पौंदी ऐ ते पिता लोकें गी पुछदा ऐ)

पिंटु दे पिता : केह गल्ल भई, केह होई गेआ ?

इक महल्लेदार : होना केह हा, तेरे जागतै रौला पाइयै सभनें गी
किट्ठा करी लैता जे अगग लग्गी गई, अगग लग्गी
गई, अस सब्भै कम्म-काज छोड़ियै दौड़दे इत्थै पुज्जे
तां दिक्खेआ किश बी हैनी। कैसा कनीती ऐ एह
झूठा जागत ?

दूआ महल्लेदार : तुस इसगी समझांदे कीऽ नेई ? एह ते दिन-दिन
बिगड़दा जा'रदा ऐ। कैसे मांऽ-बब्ब ओ तुस ?

(पिंटु दौड़ियै अपने पिता कोल औंदा ऐ ते अपनी
सफाई दिंदा ऐ)

पिंटु : बापू अ'ऊं बेहड़ै सफाई करियै अगग बाली। ते बस
आखेआ अगग बली गई। एहदे च झूठ कुत्थें ऐ

भला, अग ते बला दी गै न? (अग्गी आस्सै शारा करदा ऐ)

पिंटु दे पिता : पिंटु ठीक आखै करदा ऐ, जेकर उसनै आखेआ अग बली गई तां इस च इसदा केह् दोश। मेरा पुतर चंगा कम्म करै तां बी इससै उप्पर दोश मड़दे ओ। ते फही एह् तुसेंगी घर सददन ते गेआं नेहा। तुस कीऽ किट्ठे होई गे। चलो अपने-अपने घरें गी।
(लोक आपस च गल्लां करदे बापस परतोई जंदे न ते पिंटु खुश होई जंदा ऐ)

(रोशनी fade out होदी ऐ फही fade in होंदी ऐ।)

पिंटु दी मां : पिंटु, मिगी ते तेरे बापू गी कुतै बांहडै जाना पेआ ऐ। तूं घर गै र'मेआं। दिक्खेआ कुतै बाहर जंदा होएं। एह् महल्ले दे लोक बड़े भैड़े न।

पिंटु : चंगा मांऽ, तूं चैंता निं कर, अ'ऊं घर गै रौहड।
(ते ओह् दोऐ घरा निकली जंदे न। तुआंह किश चिरै परैन्त पिंटु गी त्रेह् लगदी ऐ ते ओह् पानी पीने गितै रसोई जंदा ऐ। ओह् जि'यां अन्दर पैर टकांदा उसदा पैर अपने मुहार बैठे दे सप्पै उप्पर रखोई पेई जंदा ऐ ते सप्प उसगी डंग मारी ओड़दा ऐ। पिंटु पीड़ै कनै तड़फन लगदा ऐ)

पिंटु : सप्प-सप्प, बचाओ, बचाओ....।

(जोरे-जोरे करलांदा ऐ पिंटु दी अबाज महल्ले तगर पुजदी ऐ पर झूठ समझियै कोई नेई औंदा।)

इक महल्लेदार : एह् अबाज कुत्थुं आवै करदी ऐ ?

दुआ महल्लेदार : उ'ऐ झूठा पिंटु अज्ज कोई होर तमाशा करादा होना ऐ?

पैहले आह्ला : छोड़ उसगी, तूं अपना कम्म कर।

(इस बारी उसदे सच्चै उप्पर बी कुसै जकीन नेई कीता। ओह लगातार करलांदा जारदा हा, इच्चरै गी पप्पु उं'दे घरै कोले लंघड लगा तां उ'नै पिंटु दी अबाज सुनियै अंदर झांकी मारी तां उ'नै दिक्खेआ पिंटु सच्चें गै भुंजा बिलै करदा हा। उसगी करलांदे दिक्खियै पप्पू नै बी रौला पाई ओड़ेआ)

पप्पू : चाची, चाचा, रवि सप्प सप्प, सप्प तौले आओ, सप्प।
(लोकें गी इस बारी पप्पू दी बाज सनोची तां लोक झट्ट किट्ठे होई गे उ'नें दिक्खेआ पिंटु गी सच्चें गै सप्पै ने डंगी ओड़े दा ऐ। लोकें झट्ट पिंटु गी हस्पताल पजाया ते सप्पै गी तुप्पियै मारी ओड़ेया। हून पिंटु दे मांस-बब्ब बी परतोई आए दे हे।)

पिंटु दे पिता : केह् होआ.... ?

(दूए पाससै। डा० पिंटु गी दिक्खियै टीका लाने ते डंगै आहली थाहर पट्टी बनने दा अभिनय करदा ऐ ते पही सामनै खड़ोते दे लोकें कोल औंदा ऐ। उसगी औंदे दिक्खियै पिंटु दी मांस अगै होइयै पुछदी ऐ)

पिंटु दी मांस : (घावरे दे) डॉ० साहब पिंटु दा केह् हाल ऐ? ओह ठीक ऐ न ?

डॉ० : (पप्पू ते होर लोकें कन्नै मखातिफ होइयै) खरा होआ जे इ'नें पिंटु गी बेल्ले सिर मेरे तगर पजाई ओड़ेआ। जेकर थोहड़ा बी चिर लग्गी जंदा तां जैहर पूरे शरीरै च फैली जाना हा ते इसदा बचना मुशकल होई जाना हा।

पिंटु दे पिता : (दोऐ हत्थ जोड़ियै) डॉ० साहब तुंदा मता-मता शुक्रिया।

डॉ० : शुक्रिया मेरा नेई, बल्कि (पप्पू ते होर लोकें आस्सै शारा करांदे) इ'नें लोकें दा करो जि'नें बेल्ले सिर पिंटु गी मेरे तगर पजाया ते अ'ऊं इसदा जैहर कड़डने च कामयाव होई सकेआ।

(पिंटु दे पिता शरमिंदगी कन्नै दोऐ हत्थ जोड़दे होई पप्पू ते बाकी महल्लेदारें कन्नै मुखातिफ होंदे न)

पिंटु दे पिता : तुंदा मता-मता धन्नबाद, अ'ऊं तुंदा कर्जदार होई गेआं। अज्ज तुं'दे करी गै मेरे जागतै दी जान बची ऐ।

इक महल्लेदार : धन्नबाद दी कोई लोड़ नेई एह ते साढ़ा फर्ज हा।

पिंटु दे पिता : मिगी माफ करी ओड़ो, अ'ऊं तुसेंगी गल्ल समझियै किन्ने बारी चंगी-माड़ी आक्खी (दोऐ हत्थ जोड़े दे गै) मेरी भुल्ल ही, मिगी माफी देई ओड़ो।

दूआ महल्लेदार : कोई गल्ल नेई भाई जी, पिंटु बी साढ़े ज्याणें आंगर गै। अस सब ते ओहदी भलाई गै चाहन्ने आं।

(तुआंह लेटे दे पिंटु गी हून होश आई गेदी ही।
उ'न्नै दिक्खेआ उस कोल रवि, साहिल ते पप्पू

खड़ोते दे न। हून उसगी अपनी गल्ली दा सच्चें गै
एहसास होई गेदा हा, उ'नै बिंद उठदे होई पप्पू दा
हथ फड़ी लेआ)

पिंटु : पप्पू अज्ज जेकर तूं मेरी मदद नेई करदा तां
अ'ऊं....(रोन लग्गी पौंदा ऐ) मिगी माफ करी ओड़।

पप्पू : कोई गल्ल नेई पिंटु। तूं लेटेआ रौह। उ'आं हून तूं
ठीक ऐ नां?

(ते पप्पू उसगी फही लटाई ओड़दा ऐ)

पिंटु : पिंटु (मुंडी ल्हांदा ऐ) हां।
(फही त्रौनें आस्सै बारी-बारी दिक्खियै)
अ'ऊं हून कदे झूठ निं बोलड। कसम खन्नां।
(त्रैवै खुश होई जंदे न)

रवि : पिंटु मम्मीं आखदी ऐ, जेहड़ा बडले दा भुल्ले दा
त्रकालें परतोई आवै उसगी भुल्ले दा नेई आखदे।
(इस बारी पिंटु बी हसदा ऐ)

(Flash Back End)

(हून स्टेज उप्पर फही दादी शा बड़े ध्यानै कनै
गल्ल सुनदे संजू ते जोती ओंदे न)

जोती : दादी, केह सच्चें गै पिंटु ने फही कदे झूठ नेई बोल्लेआ।

दादी : हां, फही उ'नै कदे बी इस चाल्ली दा झूठ नेई
बोल्लेआ। सिर्फ इन्ना गै नेई हून ओहदे माऊ-बब्बे
गी बी अपनी भुल्लै दा एहसास होई गेदा हा। हून

जेकर कदे पिटु कोई गल्ती करदा बी हा तां बी उसदे
मांऽ-बब्ब गल्ती करने उप्पर उसगी ठाकदे ते समझांदे
बी हे।

संजू : दादी हून बी महल्ले दे जागत उसगी झूठा आखदे
हे? उस कनै खेढे हे ?

दादी : नेई पुतरा, हून उसगी कोई बी झूठा नेहा आखदा ते
महल्ले दे सब्भै जागतै बी हून उस कनै खुशी-
खुशी खेढे हे।

संजू : सौरी दादी (दोए कन्न पकड़ियै ढिल्ला जनेहा मूंह
बनांदे) हून आ'मीं कदे झूठ नेई बोलड।
(दादी दौनें ज्याणें गी गलेंऽ लाई लैंदी ऐ)

-0-



डॉ. सुषमा रानी

नांऽ : डॉ. सुषमा रानी
 पता : नजदीक बैस्ट प्राईज,
 तोप शेरखानियां, जम्मू
 फोन : 9419255188

प्रकाशन


1. डोगरा लोक संस्कृति-लेख संग्रह
2. रूप बसंत (लोक कथें दा संग्रह)
3. कड़वे घूंट (डोगरी थमां हिन्दी अनुवाद)



Highbrow Publications

Bari Brahamana, Jammu

ISBN 978-93-82670-78-0



9 789382 670780